



UKA 2015/45

Tillie Martinussen

22. oktober 2015

Qaratsap aanaartoorneratigut timip ilaanik nukillaartoornermik nappaatillit siunner-filimik aaqqissuussaalluartunik aammalu ataqatigiissarneqartunik sungiusaanissanik ingerlatsinissani iliuusissatut pilersaaruteqarnissat pillugit Naalakkersuisut kingusinnerpaamik UPA 2016-imi Inatsisartunut aalajangiiffigisassatut siunnersuusioq-quneqarnissaannik siunnersuut.

(Inatsisartunut ilaasortaq Agathe Fontain, Inuit Ataqtigiit)

(Siullermeernera)

Demokraatini siunnersuuteqartoq qutsavigaarput pisaq pingaarutilik Inimi maani qaqqimmagu.

Napparsimasut aanaartoornermik eqqorneqartut, tassa taqqamik milittoortut imaluunniit qaratsakkut aanaartoortut pisariaqartilluinnarpaat piaartumik pitsaasumillu sungiusartarnissaq. Piaartumik eqqortumillu piginnaanngorsaqqinneq aalajangiisuusinnaavoq napparsimasup nammineeqqilernissaanut aamma sungiusarneq eqqortoq aallartinneqanngippat tamanna napparsimasumut siunissamut ungasissumut kinguneqarsinnaavoq.

Piginnaanngorsaqqiisareneq suli inatsisiliunneqarnikuunngimmat, Demokraatini qilanaarpugut taaguutip inatsimmut ilanngunneqarnissaanut. Ullumikkut, Naalakkersuisup oqarneratut, qaratsakkut aanaartoorsimasut katsorsarneqartarnerat sungiusarneqartarnerallu Peqqinnissaqarfiup - taamaasillunilu Namminersorlutik Oqartussat akisussaaffigaat - aamma piginnaanngorsaaneq piginnaasat ajorsitikkumanagit kommunimit isumagineqartarpoq soorlu aamma atortorissaarutinut il.il. tunngasut kommunip aamma suliassarigai.

Napparsimasut ataasiakkaanut, ilaqaataasunullu qaratsakkut aanaartoornermik eqqugaasunut pingaarnerpaavoq ataqatigiissumik iliuseqartoqarnissaa aamma siunnersuuteqartoq isumaqatingaarput isumaqarmat qaratsakkut aanaartorsimasunut ataqatigiissumik iliuseqartarneq ingerlaannartassasoq aallaavigalugu ataasiakkaanut nakorsaatit eqqarsaatigalugit



innersuussutigineqartut kiisalu aamma peqqinnissaqarfiup piginnaanngorsaanerani innersuussutigineqartut naapertorlugit.

Assut nuannaarutigaarput 2016-miit nunap immikkoortuisa napparsimaviini pillorissaasunik timimullu sungiusaasunik immikkut allanik atorfinitsisoqassamaarmat qaratsakkut aanaartoorsimasut eqqarsaatigalugit. Pingaaruteqarluinnarpormi taakku ilinniarsimasut nakorsallu piginnaanngorsaanssamut inassutaasa malinneqartarnissaat, malitseqartinneqartarnissaallu.

Demokraatini isumaqarpugut iliuutsit nutaat nalunaarsoqqissaartariaqarigut malitseqartillugillu. Naalackersuisut immikkoortumi annertusaanissaq pillugu nassiussaanni siunertat piviusunngortinneqarmata kiisalu peqqinnissaqarfik qaratsakkut aanaartoorsimasunut immikkut pisussaaffeqarmat taamatullu aamma kommunini nappaatit, piginnaanngorsarneqarnerup, piginnaasallu pigitiinnarniarlugit sungiusaasarnerup kingunerinut ikiorsiinissaq inatsimmi ilaammata, inassutigaarput una siunnersuut itigartinneqassasoq.